

Morning Dogri (NSD) National News Bulletin 18-04-2025

आकाशवाणी

- केन्द्र सरकार नै सुप्रीम कोर्ट गी एह् यकीन दोआया ऐ जे वक्फ तरमीमी कनून 2025 तैहत्त वक्फ बोर्ड जां केन्द्रीय वक्फ कौंसल च अगली सुनवाई तोड़ी कोई नमीं नियुक्ति नेई कीती जा
- कलकत्ता हाई कोर्ट नै मुर्शिदाबाद हिंसा च बेघर होए दे लोकें दी पंछान करने ते उनेंगी परतियै बसाने लेई इक त्रै मिंबरी कमेटी दा गठन करने दे निर्देश दित्ते न।
- महाराष्ट्र दी सरकार नै राष्ट्र शिक्षा नीति गी ध्यान च रखदे होई हिंदी गी त्री लाजमी भाषा करने दी घोषणा कीती ऐ।
- वांछित गैंगेस्टर हरप्रीत सिंह उर्फ हैप्पी पासिया गी अमरीका च गिरफ्तार करी लैता गेआ ऐ। ओह पंजाब च 14 आतंकी हमले दी योजना च शामिल हा।
- इज्ज दुनिया भरै च विश्व विरासत ध्याड़ा मनाया जा करदा ऐ। एसआई नै मुख्य भरै दे अपने सब्बने समारकें च मुफ्त प्रवेश दी घोषणा कीती ऐ।
- आईपीएल क्रिकेट च मुंबई इंडियन्स नै सनराईजर्स हैदराबाद गी चऊं विकेटें कन्नै हराई दित्ता ऐ।

<><><><><><>

Waqf-SC

सुप्रीम कोर्ट नै केन्द्र सरकार दी यकीन दिहानी गी दर्ज कीता ऐ जे अगली सुनवाई तोड़ी वक्फ तरमीमी कनून 2025 दे तैहत्त वक्फ बोर्ड जां केन्द्रीय वक्फ कौंसल च कोई नमीं नियुक्ति नेई कीती जाग। आकाशवाणी दे संवाददाता नै खबर दित्ती ऐ जे प्रधान न्यायधीश संजीव खन्ना हुंदी अगुवाई च जस्टिस संजय कुमार ते के.वी.विश्वनाथन हुंदी बैच नै सॉलीसीटर जनरल तुषर मेहता हुंदे इस आश्वासन पर बी गौर कीता जे मजूदा वक्फ संपत्तिएं दी स्थिति, जेह्दे च इनें संपत्तिएं गी इस्तेमाल करने आले आस्सेआ वक्फ दे रूपै च बक्ख-बक्ख श्रेणी च बंडी गेदिएं संपत्तियां बी शामिल न, फिलहाल उंदे च कोई बदलाव नेई कीता जाग। अदालतै केन्द्र सरकार गी वक्फ कनून 1995 च हाल च कीती गेदिएं तरमीमें दी संवैधानिक वैधता गी चुनौती देने आली ते रोक लाने दी मंग करने आलियें अर्लियें पर 7एं दिनें दे अंदर अंदर अपना जवाब दाखल करने दा बी निर्देश दित्ता ऐ।

<><><><><><>

Calcutta-High Court

कलकत्ता हाई कोर्ट नै त्रै सदस्यी कमेटी बनाने दे आदेश दित्ते न जेहड़ी वक्फ कनून गी लेइयै मुर्शिदाबाद जिला च होए दे विरोध प्रदर्शन ते हिंसा दरान विस्थापत होए दे लोकें दी पंछान करियै उंदे पूर्नवास दा कम्म करोग। कोर्ट नै आखेआ ऐ जे त्रै सदस्यी कमेटी च राश्ट्री मानवाधिकार आयोग ते पच्छिम बंगाल मानवाधिकार आयोग थमां 1—1 अधिकारी, ते राज्य कनूनी सेवा प्राधिकरण दे सदस्य सचिव शामिल होंगन। कमेटी गी अपनी रिपोर्ट 15 मई, 2025 तोड़ी लमा करोआनी पौग। न्यायधीशें सोमन सेन ते वासु चौधरी हुंदी डिबीजन बैच नै आखेआ ऐ जे केन्द्री सशस्त्र पुलिस बल मुर्शिदाबाद दे प्रभावत इलाकें च अगगे बी तैनात रौहग।

<><><><><><>

External Affairs

भारत नै आखेआ ऐ जे कैलाश मानसरोवर यात्रा गी फही शुरू कीता जाई सकदा ऐ। नमीं दिल्ली च मीडियाउ तरफा इक सुआले दे परते च विदेशी मामले दे मंत्रालय दे प्रवक्ता रंधीर जयसवाल होरें आखेआ जे मंत्रालय तरफा जनता आस्तै तौले गै कैलाश मानसरोवर यात्रा गी लेइयै सूचना जारी कीती जाग। भारत—चीन बश्कार सिद्धी हवाई यात्रा सेवा ब्हाल करने बारे च जयसवाल होरें आखेआ जे दवै देश इस बारे सैहमति जताई ऐ। उनें जोड़ेआ जे दौनें देशों दी तकनीकी टीमां हवाई यात्रा फही शुरू करने आस्तै तकनीकी तैआरियां करा'रदे न। 26/11 मुंबई हमले दे मास्टर माइंड तहव्वर राणा गी भारत आननने बारे रंधीर जयसवाल होरें आखेआ जे राणा दा भारत वापस आन्नना पाकिस्तान गी चैंता दोआंदा ऐ जे मुंबई हमले दे दुए षड्यंत्रकारिएं गी बी भारत आन्नना पौग जिलेंगी ओ लगतार बचा'रदा ऐ। उनें आखेआ जे पाकिस्तान जिन्नी मर्जी कोशश करी लै, पर ओह्दी आतंकवाद दे केन्द्रबिंदू होने दी छवि खत्म नेई होग। उनें पाकिस्तानी सेना दे चीफ दे कश्मीर बारे दित्ते दे ब्यान पर आखेआ जे कश्मीर भारत दा हिस्सा ऐ। विदेशी मामलें दे मंत्रालय दे प्रवक्ता होरें एह् बी दस्सेआ जे भारत बैल्जियम कन्नै नेड्में तौरा पर कम्म करा'रदा ऐ तां जे भगोड़े उद्योगति मेहुल चौकसी गी भारत वापस आन्नेआ जाई सकै। जयसवाल होरें दस्सेआ जे मेहुल चौकसी गी बैल्जियम च भारत बक्खी प्रत्यपूर्ण अर्जी मगरा गिरफ्तार करी लैता गेआ ऐ।

<><><><><><>

Maha NEP

महाराष्ट्र दी सरकार नै मराठी ते अंग्रेजी माध्यम आले स्कूलें च पैहली क्लास कोला लेइयै 5मीं क्लास तोड़ी हिंदी भाषा गी त्री लाजमी भाषा करने दी घोषणा कीती ऐ। इआं राश्ट्री शिक्षा नीति 2020 गी दिक्खदे होई कीता गेआ ऐ। मजूदा समें च इनें स्कूलें ५ पैहली क्लास कोला लेइयै चौथी क्लास तोड़ी छड़ा मराठी ते अंग्रेजी भाषा लाजमी ही। आकाशवाणी दे संवाददाता नै खबर दित्ती ऐ जे महाराष्ट्र दे राज्य स्कूल शिक्षा मैहकमे दे राज्य स्कूल शिक्षा मैहकमे नै राश्ट्रीय शिक्षा नीति 2020 दी सफारशें दे आधार पर चरणबद्ध तरीके कन्नै नमां पाठक्रम लागू करने सरबंधी सरकार दा संकल्प जारी कीता ऐ। एह्दे मताबक अगले शिक्षा ब'रे थमां पैहली क्लास कोला लेइयै 5मीं क्लास तोड़ी हिंदी त्री लाजमी भाषा होई जाग। एनईपी दे मताबक नमां पाठक्रम 2025—26 च पैहली क्लास लेई लागू कीता जाग।

<><><><><><>

PASSIA

वांछित गैंगेस्टर हरप्रीत सिंह उर्फ हैप्पी पासिया जेह्दे च जानकारी मताबक पंजाब च 14 आतंकवादी हमलें दी योजना बनाने दी योजना च शामिल ऐ, गी अमरीका च अप्रवाम ते सीमा शुल्क लागू करने सरबंधी मैहकमे नै हिरासत च लेई लैता ऐ। राश्ट्री जांच अजेंसी गी बी हैप्पी दी तलाशही। एह्दे शा पैहले एनआईए नै पासिया पर 5 लक्ख रुपे दा नकद इनाम बी घोषत कीता हा, जिसलै ओह्दे पर कथित तौर पर चंडीगढ़ च इक घर ते पंजाब च पुलस थाने पर ग्रनेड हमले च शामिल होने दा बरोप ऐ। हैप्पी गी पाकिस्तानी गैंगेस्टर थमां आतंकवादी बनी गेदे हरविंदर सिंह संधु उर्फ रिंडा दा करीबी मन्नेआ जंदा ऐ। हैप्पी उप्पर पंजाब च पाकिस्तानी आईएसआई, रिंडा ते बब्बर खालसा इंटरनेशनल कन्नै रलियै आतंकवादी गतिविधिएं गी आयोजित करने दा आरोप ऐ।

<><><><><><>

World Heritage Day

विश्व धरोहर ध्याड़ा अज्ज पूरी दुनिया च मनाया जा'रदा ऐ। इसी स्मारकें ते महत्वपूर्ण थाहरें दा अंतर्राष्ट्री ध्याड़ा बी आखदे न। इस ब'रे इस ध्याड़े दा विशेषार ऐ आपदा ते टकराव करी धरोहर खतरे च। साढ़े संवाददाता नै दस्सेआ जे इस दिन गी हर ब8रे 18 अप्रैल गी अपनी संस्कृति ते प्राकृतिक धरोहर दे सम्मान च ते संभाल आस्तै मनया जंदा ऐ। पिछले किश ब'रें च भारत ते विश्व धरोहर सूचि च अपनी मजूदगी बधाई ऐ।

विश्व धरोहर सूचि च भारत दे 43 थाहरा शामिल न ते यूनेस्को दी आजमाहिशी सूचि च 62 होर थाहरां शामिल न। अज्ज दे ध्याड़े भारती पुरात्व सर्वेक्षण नै पूरे देश च एएसआई तरफा संरक्षत स्मारकें च मुफ्त प्रवेश दी घोशणा कीती ऐ। एह्दा मकसद लोकें गी देश दी सांस्कृतिक विरासत बारे जानकारी देना ऐ।

<><><><><><>

Good Friday

समूलचे मुल्ये च अज्ज गुड फ्राइडे मनाया जा करदा ऐ। दुनिया भरै च ईसाई समुदाय दे लोक गुड फ्राइडे मनांदे न। गुड फ्राइडे यीशू मसीह हुंदे सूली पर चढ़ने दे चेते च मनाया जंदा ऐ। एह् ध्याड़ा शोकमनाने, चिंतन करने ते अध्यात्मक लगन कन्नै सरबंधत ऐ। अज्जै दे दिन गिरजाघरें च खास प्रार्थना सभाएं दा सरिस्ता कीता गेदा ऐ। प्रधानमंत्री नरेन्द्र मोदी होरें गुड फ्राइडे पर अपने सनेए च यीशू मसीह हुंदे बलिदान गी चेता कीता। उनें आखेआ जे एह् दिन असेंगी नेकर, सद्श्राव ते बड़डा दिल रखने आस्तै प्रेरित करदा ऐ, उनें कामना कीती जे शांति ते भाईचारे दी भावना दुनिया च म्हेशां कायम रवै।

<><><><><><>

IPL

आईपीएल टी-20 क्रिकेट च जंदी रातीं मुंबई दे वानखेडे स्टेडियम च खेड्डे गेदे मकाबले च मुंबई इंडियन्स नै सनराईजर्स हैदराबाद गी चऊं विकटें कन्नै हराई दित्ता। पैहले बल्लेबाजी करदे होई सनराईजर्स हैदराबाद नै 20एं ओवरें च 5एं विकटें दे नुकसान च 162 रंज बनाए। जवाब च मुंबई इंडियन्स नै 18.1 ओवरें च 6एं विकटें दे नुकसान च एह् लक्ष्य हासल करी लैता। अज्ज संजा साढ़े 7 बजे बैंगलुरु दे चिन्ना स्वामी स्टेडियम च रॉयल चैलेंजर्स बैंगलुरु दा मकाबला पंजाब किंग्स कन्नै होग।

<><><><><><>